

国朝耆献类征初编

國朝耆獻類征初編

國朝耆獻類徵初編卷四百三十一目錄

文藝九

吳農祥

宗室文昭

蒲松齡

璩美斯

郭遠

汪舍亭 子沆

潘兆

蕭維箕

王源 子兆符

王翬

姚匡 顧文淵  
徐方

游士端

景星杓

楊紹奭

郭彭齡

李瞰

陳士良

孫璟

陸鵬 嚴載

馬逸 王順曾

周洽

王邦采 吳楸

劉戡

田夢月 周琰

萬松齡 李夢鵬

郭毅

徐德宗

鄒漪 秦保寅

蕭正模

王史直  
王史鑑

吳之振

丁一焯

唐岱

趙永懷  
趙明鼎  
李礎先

李崧

國朝耆獻類徵初編卷四百三十一



通奉大夫前署江西巡撫江西布政使司布政使湘陰李桓輯  
文藝九

吳農祥

徵君吳氏名農祥字慶百一字星叟故錢唐諸生也其先自海鹽  
海甯再徙而家於此曾祖上世皆不顯至祖繼志始仕雲南越州  
衛經歷父太沖明崇禎辛未進士由翰林累官右春坊右中允徵  
君其長子也兒時爲馬文忠公世奇所知曰他日當以文冠世年  
十許歲數往來婦翁家婦翁者傅巖也會三九公譙陳公函輝發  
題命坐客各製芙蓉露下落賦徵君最下坐舐筆賦就末更綴以

詩其落句云一輩少年爭跋扈明公從此願躬耕陳公歎爲英異者久之初徵君祖經歷君好聚書且勤掌錄祕閣之鈔逾萬卷及宮允鼎貴則家益有賜書軸帶帙籤至與山陰祁氏海虞錢氏埒於是徵君旣長構樓於別業之梧園儲書其上與弟農復登樓而去其梯戒不聞世上語盡發所藏書讀之朱墨句稽識其大者旁又囊篋細碎囚鎖怪異搜巡疑互並潰漏發筆語則纚纚然居久之會康熙戊午天子開博學鴻儒科徵君以大司空陳鼐承薦被牒書敦迫上道至京師辭於通進司者三辭於吏部者二皆不報明年三月試太和殿廷上命三大學士暨掌院學士定甲乙徵君卷議在甲伍中有日已而不與上顧大學士等舉所遺

舉所遺則首以徵君聞已又不與或曰是有以蜚語聞者或曰是索其卷無有故罷其事祕不可知也徵君之至京師也大學士馮文毅公溥客之代舍時稱佳山堂六子六子者陳維崧毛奇齡吳任臣王嗣槐徐林鴻及徵君也維崧奇齡任臣既入史館嗣槐試不及格而用 天子後命畱官中書舍人獨林鴻與徵君不就徵

君尤倦遊旣宿畱不耦則乘薄笨車出郭門藥囊書帙縷破藍藍然送者自大學士馮公以下吁嗟歎之徵君曾不芥蒂曰吾道蓋是乃今可遂吾初服矣徵君爲肩蛄鼻鶴脰指爪長三寸須鬣鬣頽然淵放得錢輒付酒家而識徵見遠略不干人以私人亦無敢于以私者社事之殷也吳下士沿復社故態角爲尊奢門戶各不

通水火而浙西郡若讀書秋聲登樓孚社及慎交諸社爭立名字  
應之各欲引徵君書幣交戶外者屢且滿徵君曰是載禍見餉也  
諸君子忘東京鉤黨事乎不荅書亦不發視其後 天子果切齒  
諸爲社事者盡搜所刊錄摧燒之於今著爲令世咸以徵君知幾  
國初通籍者往往有徵君故大司馬孟□□督河朱之錫方伯彭  
而述其著也數以書招徵君謝勿往或枉車騎過之亦匿不肯見  
而族兄□守蘇州六年賓客聞咽徵君一以書問無恙而已迄不  
至他日邂逅於可中亭族兄欲載與俱歸不可則以縑置船中徵  
君遽捨船去其介也如是獨嘗一應李文襄公之芳聘當是時文  
襄以蕩寇功督兩浙建牙於三衢以提閩衝羽棹檠幢吏從帶弓

鞭夾陞立上謁者或不敢仰視徵君至則長揖之明日宴於射堂  
軍中以鳴鏑射戟校伯酒酒半文襄離席起酌金叵羅爲壽徵君  
前請草露布徵君且飲且口占授書吏一坐盡傾久之辭去爲畫  
便宜數事文襄再拜曰感君良箴吾曩者知君不盡乃以爲文士  
也徵君內行敦篤遇三黨有恩紀其於朋好性命也鄞縣周容太  
倉王昊客死京師質衣爲具含賻視白旛卽路乃返晚與陸堦毛  
奇齡徐林鴻爲飲酒難老之會月一會會輒推文史一日偶及興  
獻禮並牽連濮安懿王事奇齡以司馬光楊廷和議非是詈詞狠  
籍口角流沫墮餐飯中徵君伺其閒也爲一難以送之奇齡亦未  
有以應蓋徵君好史法其於明代事尤悉棘棘不阿然一以公心

聽皆此類也康熙戊子七月十六日卒年七十七矣初徵君之生也母張夫人夢偉衣冠者七人抱一兒投之曰以爲而子請其年曰二七及是果驗所著古今體詩一百三十四卷古文一百四十卷駢儷文四十卷詩餘二十四卷他雜著又一百六十八卷子裕孫慎思編以藏於家皆殺青可繕寫

野史氏曰韓愈稱樊宗師曰多矣哉古未嘗有也元稹序長慶集曰樂天之長可以爲多矣徵君亦云然徵君不以自多遇後生一字之工三復不能已其子之友壻方棨如者把文謁之亟歎以爲當今無輩又錄其弟棨如詩數篇入所撰驚喜集中然至其意所不可雖翰音登天不一以色詞假也徵君素彊無疾前卒之一年

家不戒於火盡所嘗讀書燬焉自是遂病病或浹日不食亦不語  
曰吾無與爲質矣踰年竟卒其以書死生如此

右傳方縈如撰

吳農祥字慶百號星叟錢唐縣學生著有輿圖隸史彙考補錄文  
獻通考嘯臺讀史綠窗讀史梧園雜志宣齋南歸雪鴻流鉛嘯臺  
等集乳哺啞啞私語皆建文遜國時事過十歲方不言與志伊齊  
名皆博綜能文虎林呼爲二吳尤精於易與毛西河善又有錢邑  
志林唐詩辨疑詞苑等書康熙戊午舉博學鴻儒陳鼐永薦謂經  
國鴻業固賈生晁令之儔卽雕蟲小技亦相如子雲之亞益都相  
公古文則稱農祥汪琬儷體稱農祥及陳維崧詩賦亦稱農祥毛

奇齡小詞則推維崧彭孫逵越闔又以農祥爲首入都止竹林寺  
不遇歸家以著書自娛有畫圖梧園記云余舊業在錢唐門東有  
梧桐數十本顧而樂之因自名曰梧下先生家貧質之鄰家意忽  
忽不樂有客見慰曰請爲先生實之遂圖畫梧桐數十本見貽曰  
此梧園也先生其自爲之記若夫土稱五沃樹記九枚比屋亭亭  
遙集將雛之鶴虛簷歷歷爭棲引子之烏南岳舊歸北窗栽得玉  
郎三尺循後會以重來金管一株聞清歌而不去雜惠施之雄辨  
紀何遜之雅遊同挹深杯兼聆譚柄雖命多顛顚勢等孤生運迫  
流離體符半死而形成兔目節等宮槐皮躍龍鱗莖含庭柏幢幢  
車蓋定依先主之桑濯濯闌干猶望桓公之柳風高廉懦植孤竹

而危吟姓託虛無數長梧以述願爾乃蓬蒿一畝蘿薜雙扉蟻垤  
常遷蜂房恆閉棠梨舊館已屬他人叢桂小山難招知己空庭老  
樹悉歸朱戶之家若木一枝僅傍丹邱之樹垂垂銀漢指天上之  
匏瓜纂纂紅牆隔鄰家之甘棗於是吹臺朗月不入虛帷習井迴  
飆隨投警枕結根幽谷暗滋元雨之陰接葉阿房斬吐黃鐘之律  
豈非生由位賤探鳳穴而無奇名以人卑排龍門而獨立者哉客  
有畢宏後輩曹霸前身點染煙霞淋漓邱壑烘雲吸霧玉除之芳  
草爭飛量雨論晴金谷之名花如醉怒拔淩雲之廣圃拏攢蛟龍  
纖抽撲地之平臺淒迷蛺蝶解衣槃礴袖筆凝思傾北部之臙脂  
注東方之沆瀣於是吳宮萬頃齊殿千條影始扶蘇聲仍激楚似

瀛洲之咒活剪列華池若闔苑之移來刻成清露劈分白蘭啟溪  
閣之千層裂取紅綃豁風亭之百尺淺深石磴各置藜牀高下雲  
廬何煩竹杖莫不蔽虧丹廡照耀碧林草帶交暉苔衣胥化神游  
未幾恍登庾信之園目賞不忘突入潘尼之宅猶記韶光初麗淑  
景方妍紫燕則亟欲生雛斑鳩則驚看逐婦微茫吐葉漸分萸莢  
之形次第含苞徐茁楊稊之色銅溝漲綠金市鋪丹吹落紅鯨在  
別院將飛之後積來白毳是春城不埽之初驗節序則徵信周書  
紀月令則私占戴記江光寒食霽景清明乳酒重門墮懶脂而立  
溼華藏深巷啄雀喙而成膠戲可爲珪取能扣鼓已而麥秋近熟  
梅信微蒸飄來柏子之香捲盡蓮花之漏洪枝驟大修幹斜垂滴

入清油聯徑則陰森十里瀉開朱霧交柯則覆蓋千人導巫雨於  
青天都成卵色嘆湘瀾於白日皆作魚鱗陰兔迴標陽烏斂轡所  
以科頭老子晞髮才人苦澤國之餘波畏炎洲之烈燄築長春之  
館無地埋愁尋消夏之灣何時寄跡細房蓮淨便擬乘舟長鬣松  
青卽懷舉扇況復披襟列坐解帶孤眠駕眾竅而常虛鼓洪濤而  
不斷耶秋隨白帝序易黃姑玉擲參差不盡長年之怨金投瑣碎  
逾深塞士之嗟每飄逸響於琅玕時中清商於琴瑟空階蟋蟀祇  
助蒼涼隔嶺蟪蛄彌增哀訴挂珠簾而晝入拂羽帳以宵飛那藉  
嚴霜爭橫衣桁不干落照還上釵梁昔也少婦多愁文人失職暫  
看旅雁輒傷遲暮之心纔對曉猿遽掩盈懷之淚煙霏露壓竹奚

託以相思月白風清荷何因而說恨此則子良有賦忻素賞之在  
今沈約含悲俟末光而未照者也至生梧子實結桐花小似綠珠  
朗於紅豆鮮同菱芡光浮琥珀之樽嬾類蓮房影亂芙蓉之府當  
其離離承萼華華垂條味溢三厄香盈百和杏梁奔迸雕陵之鵲  
羣飛薄水澄泓灌瀆之魚畢集從茲幽緒雅合清襟供茶竈之餘  
歡佐酒鑪之佳賞銜來丹羽貪分鸞鷺之糧馳送朱脣狂鋤葡萄  
之錦此則晨炊未舉藉以療飢宿醉難醒由之解渴者矣不第此  
也僕家居東郭地比南宮頻苦囊空尤嗟羹盡對妻穉子餐白石  
以爲資悍婢愚童向朱扉而請乞三聲牛角不無齊國之懷一片  
豬肝大搏屠門之笑近且臺難避債室雜催租數卷賜書旋償酒

券盈箱小賦亦質錢家大苦飢虛辭主人而遠去鶴窮搖落逐仙  
侶以高騫空畱畫餅之名徒述鋪糜之念藤梢橘刺拉沓摧燒葛  
葉榆皮辛勤採掇何圖金粉遂累丹青略驅洞壑之幽便帶雲霞  
之麗洪亭細數一縣河陽紫府虛探四時建始游絲繞路疊影當  
關任儉方朔之桃許買王戎之李柔柯芍藥堪因折贈而傷心弱  
蔓薔薇競欲徘徊而浣手訪衛郎而翦韭致此何難憑張翰以思  
尊不妨相對悲夫貧真原憲亂識王尼詎分梓澤之花狼藉沙棠  
之樹鬱金堂側或有賴於化人羣玉山巔究何殊於幻術好事傳  
觀而動色迺千秋鳳闕之廬故人持贈以咨嗟僅一段鶯溪之絹  
著有古今體詩一百三十四卷文集稱是全謝山謂所作擬史諸